

Nalakkersuisut pisussaaffilerneqassasut kingusinnerpaamik UKA/2019-imi aningaasaateqarfimmik pilersitsinissamik siunnersuuteqassasut Kalaallit Nunaanni isumagininnikkut ajornartorsiutaasunik ilisimatusarnissanut, nalilersuinissanut pinaveersaartitsinissanut misissuinissanullu atorneqartussamik. Meeqqat inuusuttullu navianartumik inissisimasut - imaluunniit meeqqat inuusuttullu navianartorsiortinneqarnissaminnut aarlerinartumiittut ilaqutaallu pingaarnerusutigut aningaasaateqarfiup siunertatut siunertarissavaa.

Siusinaarluni iliuitsit, aningaasarsionertigut siusinaarluni iliuseqarusulersitsisunik ingerlatinnarlunilu iliuseqarnissat aamma periutsinik nalimmassaanerit, inunnik isumaginninnermi katsorsaanissamik allanillu neqeroorutit aningaasaateqarfimmi ukkatarineqarnerussapput.

(Inatsisartunut ilaasortaq Tillie Martinussen, Suleqatigiissitsisut)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Inatsisartut aalajangiiffigisassaattut siunnersuummut saqqummiunneqartumut Naalakkersuisut qujapput, siunnersuuteqartorlu nersualarusullugu Kalaallit Nunaanni isumaginninnermi ajornartorsiutinut pitsaaliuinnermut aqqiissuteqarnissamullu ilisimasat naapertorlugit pullaviup pingaaruteqassusia ukkammagu.

Isumaginninnermut suliassaqarfimmi ilisimatusarnerup atorneqarnera ukiuni kingullerni annertusingaatsiarsimavoq. Ilisimasat misissueqqissaarnerillu tunngavigalugit pullaveqarnissap siuarsarneqarnissaa pillugu suliniutit arlaqarsimapput. Isumaginninnermut suliassaqarfimmi periusissanik iliussissanillu ineriartortitsinnermut atatillugu anguniarneqareerpoq nakkutilliinerup nalilersuinerullu eqqarsaatigineqartarnissaat. Assersuut pitsaasoq tassaavoq Killiliisa, pinngortinneqarnerani ingerlaavartumillu nalilersorneqarnerani ilisimatusarnermik tunngavik pullavigineqarmat.

Tamatuma saniatigut eqqaaneqassaaq, Isumaginninnermut Inatsisinillu Atuutsitsinnermut Naalakkersuisoqarfik Isumaginninnermullu Aqutsisoqarfik ilisimatusarfinni Ph.d.-nik suliniutit pillugit annertunerujartortumik suleqateqalermata. Siunissami periusissat uppersakkani tunngaveqarnissaat aamma suleqatigiinnerit taamaattut siunertarivaat.

Sukkassuseq annertussuserlu naleqqukkaangat, ukiut tamaasa isumaginninnermut suliassaqarfimmi misissueqqissaarnerit annertuut aallartinneqartarput. Tassunga assersuutaapput pisortanit ikiorsiissutit pillugit misissueqqissaarneq, inuit innarluutillit pillugit suliassaqarfimmik misissueqqissaarneq, Meeqqat pisinnaatitaaffii pillugit Naalagaaffiit Peqatigiit isumaqatigiissutaata Kalaallit Nunaanni atulersinneqarnissaa pillugu nalunaarusiaq, taanna suliffeqarfinit ilisimatusarfiusunit suliarineqarpoq.

Taamatuttaaq Kalaallit Nunaanni Naatsorsueqqissaartarfiup ataaniittussamik meeqqat pillugit paasissutissanik katersinissaq pillugu naalakkersuisoqarfiit assigiinngitsut akornanni aallarniutaasumik oqaloqatigiinnerit ingerlanneqarput.

Suliassaqarfiit assigiinngitsut akornanni meeqqat pillugit paasissutissat ataqatigiissillugit paasissutissanik katersuiffimmi aaqqissuussamik katersorneqassapput, inuillu peqqissusaannik misissuisarnerit ingerlaavartut peqatigalugit katersorneqartassallutik. Kalaallit Nunaanni Naatsorsueqqissaartarfiup ataani meeqqat pillugit paasissutissanik katersat ilisimatusartunut soqutiginnittunut atorneqarsinnaasunnngortinneqarsinnaassapput.

Aningaasaateqarfiit arlaannaannulluunniit attuumassuteqanngitsut oqaloqatiginissaannut suleqatiginissaannullu Naalakkersuisut ukiut kingulliunerusut ukkassisimapput. Matumani aningaasaateqarfiit soqutiginnittut tamarmik ataatsimeeqatigineqarsimapput, tassani isumaginninnermut suliassaqarfik saqqummiunneqarsimalluni. Ilisimatusarnermit isigalugu Kalaallit Nunaanni pissutsit pillugit soqutiginninnissap sakkortusarneqarnissaa kiisalu Kalaallit Nunaanut ilisimatusarnermik suliniutit amerlanerusut kissaatigineqarnerat siunertarineqarsimavoq. Ataatsimiinnerup kingunerisimavaa toqqaannartumik toqqaannanngikkaluartumillu attaveqaateqalerneq, ilaallu suleqatigiinnermik kinguneqareersimapput. Suleqatigiilluarnerit pissarsiviulluartut aallartinneqareersut pillugit assersuut alla taasinnaasarpud tassaavoq, Mary Fondenimik suleqateqarneq aamma arnanut persuttagaasimasunut suliniutinik nukittorsaanerusoq.

Taamaalilluni sammineqartunut uppersarsakkanik tunngavilinnik pullaveqarneq, siunnersuuteqartup aalajangiiffigisassatut siunnersuummi allaaserisaatut, ullumikkut ukkatarineqartorujussuuvuq, soorluttaaq taaneqareersutut suliffeqarfinit ilisimatusarfiusunit suliassaqarfinit naleqquttunut misissueqqissaarnerit ingerlaavartumik ingerlanneqartartut.

Inatsisartuni siunnersuut ilalerneqassagaluarpat, tamanna aningaasanut inatsisissaq pillugu isumaqatigiinniarnernut atatillugu ataatsimoortumik tulleriiarinnermi, siunnersuutit aningaasartuutaasussat allat assigalugit ilaatinneqassaaq.

Qulaani taaneqartut oqaaseqatigalugit, Naalakkersuisut innersuussutigaaq siunnersuut itigartinneqassasoq.